

珂

雪

叅

前

集

珂雪齋前集卷之四

公安鳧隱袁中道著

友人景謨汪宗文校

詩

梅花

惟石巉巖間蕭然一株在素質與清心不逐羣  
芳隊衆人愛此花此花豈宜愛譬如覲大士只  
合歛容拜獨存烟霞姿了無妖韶態神契渺難  
參風領絕塵外

其二

何地無名花第一論標格艷色與濃香等是花  
臧獲我欲忻賞之只是難招客淨名作上賓莊  
周處下席阮宣何點輩行酒充廝役若無世外  
人吾寧爲花惜天上俗仙娥勿來爲花厄

其三

朝來花底坐微香染清醉清醉猶未已冷然成  
佳寐瞥見四圍山萬仞直拔地玲瓏萬竅空苔  
文綴深翠山徑響石渠珠泉自天墜澹月來山

腰流波湛寒淚途逢一高僧邀我岩中寺坐我  
白石牀語語天外事譚鋒尚未終警鶴一聲至  
依然花下人清香來撲鼻

乙巳元日試筆呈中郎

生計今粗定停游且住家坐眠常隱竹杖屨不  
離花魚鳥專三徑金湯付五車夭桃春水漲湖  
上試新槎

其二

石簞無俗葉浪柳有清絲通續非同調王裴屬

五言集  
異枝乳和三教義弢解一朝詩去去烟林畔吞  
花未許遲

會長石太史以詩寄率爾次韻

園竹遲佳客庭梅憶道人交情同水乳會合係  
星辰花送三番信湖銷一半春夜堂聽雨好莫  
負暫閑身

梔子樓苦雨

不是絕來客清溪久漲門室中人隱几樓外雨  
顰盆倚柱悲紅樹開窓見綠村病餘持酒戒契

潤對青尊

送蘇中舍雲浦北上

蘿月松雲一枕清塵緣催促赴王程只將九陌  
飛沙氣換去三湖捲雪聲衆裡且收牙後慧行  
來宜似耳中鳴閑時獨步城西社忍見蒲桃抱  
蔓生

予與伯修諸公舊結蒲棗社

游章臺寺同中郎傳仲執諸公

走馬蹊猶在鳴牛路不遙沉蒼存古栢淨綠漲  
新苗香跡傳騷代荒城想閨朝青青墻畔柳還

似美人腰

其二

鼎沸人烟盡澄湖素練開雨清調馬路月上看  
花臺地僻千畦菜僧貧一院苔鐘聲日暮起松  
梵有餘哀

其三

風月淒清夜時時見楚王姁魂憑鄭袖嬖鬼侍  
龍陽蔽日旋臺樹遮天繞殿篁興亡飛鳥跡定  
裡訊支郎

午日沙市看龍舟

旭日垂楊柳傾城出岸邊黃頭郎似鳥青黛女  
如仙龍甲鋪江麗神裝照水鮮萬人齊著眼看  
取一舟先

其二

水犀神手出天鴈疾星來捲雪蛟精怒回風羯  
鼓催一標如掣電萬咲似奔雷何處妖嬈女靚  
粧又上臺

其三



倏忽青龍吼翻身截逝波攪江搖地軸激水潑  
天河態似七盤舞聲同九辨歌黑雲樓閣起風  
雨柰游何

其四

苦極皆成笑歡來忽變嗔萬橈同一臂雙眼要  
分身涵湧嗟江勢剽輕嘆楚人弄潮休羨越盤  
馬莫誇秦

同龍君超諸公遊便河得橋字

率爾翻成樂裙簪藉小舸遠林繞出寺深柳欲

藏橋明月迎團扇  
流波染素蕉  
偶來穿水曲  
咫尺便爲遙

其二

晚風來細細  
薄露淨輕綃  
近岸添新樹  
前溪識舊橋  
杯飛常帶雪  
歌罷忽生潮  
不獨烟林勝  
阿龍故自超

又步君超韻

總是高陽侶  
何妨便脫簪  
春雲妖女態  
秋水慧人心  
一字凰求曲  
三千鳥噉金  
晚來涼月上  
人

影散花陰

龍君超招飲章臺賦得看花臺三韻

不敢辭炎暑良朋會面難  
風流存語笑方畧見  
杯盤地敞風柯亂庭空浪壁寒  
荷花真是好能  
得幾人看

其二

此地舊繁華林香路不賒  
傾囊羞異品通國揀  
名花埋玉千封亂飛鞭  
一道斜餘情聊粉黛結  
習總烟霞

其三

炎極且登臺  
涼風動地來  
尊前飛冷雨  
箸下起驚雷  
八笏藏紅袖  
三衣染綠醅  
滂沱遮笑語  
但見口頻開

送水部葉寅陽還朝排律二十七韻

竹箭才名舊  
梅花氣格清  
襟懷黃叔度  
名理鄭康成  
北闕通金籍  
南陵佐水衡  
江濤如踴躍  
郢樹也芬榮  
國筭重重密  
關條暗暗輕  
祇因憂利病  
不忍問奇贏  
酌水寧言潔  
投香耻近名  
誅求

無宿淚絃管有新聲堤柳千門雪崖花五月鶯  
佔舟朝醺酒商女夜彈箏祝釐偏祠廟謳歌滿  
士氓妙綜酬物累蕭靜謝塵纓每好深湛思常  
懷玄澹情素縹羅几案蒼翠撲簷楹峙嶽還同  
靜澄川可似瑩想沉穿月脇學博下星精寶鏡  
寧疲照洪鐘不倦鳴大言羅百氏一字倒諸生  
妙悟開心筏先機閱世枰郢歌全是雪楚寶豈  
須珩拭土干將泣披衣驥子驚鳬飛欣止極鵲  
立帳南平雲壑煖容變霞江晚市晴朱幡穿下

雋白馬出湓城署粉經年別鄱籤二月程予慙  
北海跡君似蔡公迎何以酬明德清修不負盟

送王圜圖

擲去塵緣盡古人不似公五男勞粟里一婢擾  
司空髮豈須方黑顏寧待酒紅莫愁今夜雨明  
月在壺中

別陶不退時陶有長子病死瘞于此分手  
倏然故有此贈

旋風戰葉滿江鄉瘞玉埋蘭獨慘傷十九年來

悲萬子千秋亭下哭  
潘郎楚天路盡無鴻鴈鬼  
國山深怕虎狼八載飄零  
辛苦盡且尋松菊舊  
柴桑

壽湘山孫給諫五十

墮地名遂重還山賦  
更工無涯白雪字有限黑  
頭公調馬尋新路澆花出  
故宮道人閑適久塔  
藥似顏紅

其二

欲知張楚甚家世  
步騷壇葉葉珥貂易人人著

藉難春華敷麗藻  
栢凜高寒玉簡金書在齊  
驅日月丸

其三

歸山何所事  
躡屐與乘槎  
青草湖邊雪  
朱陵洞口花  
鬚眉澄水石  
文字染烟霞  
却咲裴丞相  
中年鬢已華

其四

凌雲陳羽獵  
畫地講甘泉  
日月何當霽  
烟蘿未穩眠  
心應沙共赤  
鬢與石長玄  
大藥何須問  
名



五  
臣半是僊

華容近赤河  
湖有玄石山

龍君超過訪簣管各卽席有贈

征袍常帶五陵塵江柳江花隨分春寶劍高車  
來陸賈長頭大鼻坐陳遵一天霽月偕佳客十  
畝新篁勝主人斗筭才情石筭酒閑時光景健  
時身

哭江督學進之

蜀客傳來信已果西望三川淚萬顆天下寒士  
盡吞聲使君心腸熱如火興到常時信口哦愁

來不解將眉鎖十五年前老制科乍開乍落權  
花朵憶昔飄零館娃宮倉忙一見深憐我老馬  
難忘紵衣思贖子百身無不可滄江九月捲霜  
波水冷不見西來柁身後寂寞爲君寬有義尚  
喜佳兒荷

歲暮游江上

白沙江上路沙回閑逐兒童步沼臺寒鳥也應  
喧歲暮好花如不待春來春糧分給胡居士治  
酒頻召符秀才目疾小康重病肺千般濃想盡

成灰

陶孝若謝于楚偕來賦贈于楚自蜀至而  
孝若游吳

山城生霧徑生苔忽地詩人過草萊響屧廊邊  
遲月去浣花溪上踏香來三千烟柳搖湖月十  
萬風篁遶屋雷自喜追隨同述作果然陶謝是  
天才

別謝于楚東下

碣石宮前話別忙秋風忽到輞川庄虛留客子

登山屐祇看貧家繞屋篁帆逐冶雲歸建業人  
隨雪水下潯陽誰言白髮無公道投老而今鬢  
未霜

鴈字

僧有作鴈字詩者衆詫以爲難予乃與中  
郎坐橘樂亭中角此題自辰至午各得七  
言律十首都無一字同者雖遠近離合之  
間不能悉窮其變而比物屬詞差勝于蹇  
澁不能出口者耳因悉存之

雲漢溪簾萬丈長規烟裁雨下瀟湘有時密密  
排千點何處匆匆墜一行凌月乍同王矯勁隨  
風忽作旭顛狂果然寫出恹思曲青草湖頭夜  
夜霜

其二

先後參差結構同同排筆陣向湘中畫波隱現  
沉沉霧使轉輕盈細細風書去書來愁雨雪文  
成文滅付虛空偶然霞氣侵天路僊篆丹砂爍  
爛紅

其三

倒薤懸針點碧烟依行燕雀似旁箋路經練瀆  
重多態影落巴江兩鬪妍龍躍天門隨變化  
縈煇草失翬翩慙慙寫就清秋曲譜向江南十  
五弦

其四

苦向西風憶斷羣聯翩兄弟總能文行分勢布  
剛辭渚髮縷絲騫盡入雲河北峯巒生墨氣江  
南田畝展羅紋盈盈六幅瀟湘水都作羊欣白

練裙

古人詩中有羅紋田

其五

翩翩文采出烟蘿  
電激龍盤勢更多  
數點忽留如想像  
一行纔起便吟哦  
朝衝白月都垂露  
夜宿青溪盡偃波  
鋒鏑不須凌厲甚  
前途尤恐大張羅

其六

形容天上逼高寒  
南斗闌干北斗殘  
芳草池邊縈草易  
白沙洲上畫沙難  
疾徐總以昏朝變  
肥

瘦還須遠近看宋玉宅邊逢燕子緘書一字報平安

其七

霞布雲舒縱復橫祇爲過去要留聲時和氣潤行徧好日燥風炎陣未成韻史也須稱弟子宜官何處拜先生前途若向長沙去代我修書問屈平

其八

動如得意靜如憂力倦心慵且暫休何用十年



工八法只將一字做千祿密來乍可同梁鵠忙  
處還應效史游不是衡陽過不得金書玉簡好  
淹留

其九

星河滅後見文章  
妙處拖雲更挾霜  
偶傍草邊尋鄭叟  
閒過叅裏咲蕭郎  
九霄已自懸珠玉  
百口何須足稻粱  
可是湘川多恠鳥  
欲將封事上鸞凰

其十

水作心情霞作衣多能筋骨少能肥  
烟籠雨暗青重殺月冷霜寒白更飛  
忽畫一橫詮易象乍飄三點露禪機  
江南儘有淋漓地何事風塵要北歸

新亭成即事

量來八笏已周遭左寘莊周右楚騷  
寬築垣墻圍笋竹虛張弓矢護含桃  
深林得月徧多影小水經風也作濤  
擲下萬緣書癖在強如嵇鍛與劉髦

送王以明南都應試

細雨春帆一笑開，潯陽九派起風雷。  
井生飽貯紛綸字，蘇子摩成游說才。  
有月便尋調馬路，無錢莫上散花臺。  
黃金館裏虛前席，只待譚天辨士來。

書三月初一日事

歲三月清明玄在過，我屋自云能迎神。  
請焚香沐浴竹箕啣木屑，花菓燦燈燭篆符。  
赤煌煌浩唱迎神曲，倏忽燈無光陰風來。  
謾謾題云是阿

舅夾山列仙錄云口不能言書之爾誠讀自我  
之云亡已經幾寒燠因果理無差所修悉蒙福  
上帝念我賢毋忝一方牧仙位列崇班瀟然少  
拘束朝覲清泰光暮食衆香粟邑中已死魂我  
眼悉能矚伯修慧根深青蓮已受育吉翁福業  
牽人間享尊祿官谷念未熟胎胞還再宿我有  
臨終書托嗣子付囑生死亦大難爾曹宜勉勗  
無論墮泥犁諾臯亦極酷夜臺冷荒荒燐火照  
幽獨不見生時人青楓林下哭神明好升濟白

素要純熟家有小男兒煩君爲青目已能學拜  
跪婚姻宜可卜意中頗戀戀雖去未免俗昔時  
百尺樓今已鬻天竺哀哉樓上書流落失卷軸  
阿鶩旣已嫁嫁去我所欲家門旣孤寒仗扶持  
是祝語多不能記大都念骨肉言及小男兒箕  
如以頭觸我初疑非真恐是游魂屬窮以世外  
機語語令我伏鐵鎚生異證泥船海不覆香象  
帖天飛白牛五隻足開口注箭鋒非舅那能速  
我乃拜跪言雙淚流蔌蔌西華著練衣孝標以

文督結交尚應爾何況我自出阿弟失父時如  
我在母服小者僅四歲大者不盈六舅時念黃  
口撫養同顧復愛我有智慧長與異書讀昔同  
客長安助金買燕玉譁咲忘形骸寬假緣愛篤  
三爲小縣令國牛鼎烹驚念我不能忘時時寄  
遠牘受恩百倍深人心豈土木貌諸漸長成甥  
等自親穆虛空有鬼神我言敢食不剥喙如我  
謝欲去復彳亍急雨蕭蕭來迴風搖窓竹

偶有俗冗入郡別簣簪谷

棲隱剛旬日柴桑又去陶隨人偷笋竹任鳥食  
櫻桃習靜牀初熱箋書筆未勞豈因無客至二  
徑長蓬蒿

其二

細囑灌園者吾忙返舊居沒堦花莫掃侵徑草  
先除雀乳防傷竹燕泥怕點書盆池勤守護恐  
有鶴窺魚

江北道中

長途只傍水聽水立江邊撲面楊花雪薰衣麥

穗炮遠帆行似住深樹斷猶連芳草平于掌僮  
眠牛也眠

其二

逢僧知寺近玩水愛溪遙戶戶尋蘆笋村村入  
柳條長堤隨獨馬夜浦話雙樵數點澆花雨飛  
塵冷冷銷

初至沙市張園苦雨

春晴暖日薰苗麥僕夫脫衫走阡陌一夕豆花  
雨淋淋穿屋浸堦勢太劇朝如扃戶絕來賓夜



似移床避刺客隔院琵琶不得聞手把殘書愁  
脉脉須臾天忘墨沉酣千山萬山失青藍擲海  
倒江夾雷電聲如項羽破章邯月額雨來雨相  
續犁鋤生耳那須卜塌井頽牆勢必然令我翻  
愁簣簪谷書生耳目無所寄瀟瀟只有數竿竹  
枳殼籬破垣墻倒應有人去損寒玉移植參天  
亦自難忍把斧斤截嫩綠不能迂濶效庾郎怕  
惱偷兒自藏伏世事牽我出牆東故園花竹自  
膏沐蕪徑破窓綠暗暗漏聲如語伴幽獨停午

細雨絲絲生勉着高屐寺裡行僧房寂寂門都  
閉乍聽圍碁落子聲

壽吳人沈翁

沈居  
郢

紫極長生國朱陵大隱鄉看雲懷震澤聽水愛  
瀟湘盛德披銀字高情潤玉章美言成市好尺  
宅治生良馬足何妨數鷗機久已忘譽應浮口  
頰寒不到心腸影好人人見耳鳴事事藏木奴  
存俠策甕牖笑書囊康伯逃名地君公避世牆  
河成九里潤雨樹萬家涼花木高柔室雲霞摩

詰庄鵠頭朝看帖雀尾夜焚香譜石三千甲栽  
筠十萬行請雲遮洞壑郵水試旗槍八節灘新  
就五侯鯖許嘗寘身隨下澤玩世逐高陽投去  
陳遵轄分來陸賈裝室中青玉案門外紫游韁  
蘿月催乘屐松風對舉觴清尊邀劍客寶瑟沸  
蘭堂北里歌鐘細南皮賦燭長春秋依社老日  
月付仙郎九子蒲還在雙珠樹已芳既能歌白  
雪不用祠黃羊入夢真龍子分毛自鳳凰衣冠  
來北闕奏牘似東方宛國離離血延津燦燦光

有封寧是素不醉也堪狂紫陌從生浪黑頭未  
許霜遲予三紀後煙水共徜徉

送張聚垣三兄還晉時以其先司徒公之  
喪入郢市柳木寓此聚首甚相愛也

何期白首論交情聽雨居然似弟兄戒去鸞刀  
非佞佛毀來鷄骨莫傷生人衝曉月辭沙市馬  
逐奔星度柳城倉卒已申僑札分南山石爛不  
寒盟

寓郢述懷

人皆有一癖我癖在冶游饒乏無前心計算苦  
不周中夜起長嘆百慮如絲抽萬事無巨細逼  
迫乃成憂憂來如春雨日夜苦無休以此一寸  
歡博彼萬斛愁

其二

篋衣質已盡驪日竟無策暮入慙妻兒朝出慙  
賓客忍耻告時人人乃翻見責早知逼迫難何  
用隨手擲自不重黃金黃金肯相索嘿嘿不能  
言仰面看山碧

其三

十年稟曇戒枯草如治性春風一以至草生更  
繁盛追思臥柞林六鑿頗清淨邇來逐繁華歡  
多愁亦併不獨損令名所憂在疾病猛日燦根  
荄力與春風競

其四

十萬修竹圍中有數間屋竹色暗春窓蕭蕭一  
人讀風過響琳琅雨至如膏沐世事苦泥人一  
月幾回出可憐林蘭花無人伴幽獨

長石何思二大史過公安長石用杜韻作  
詩因次其韻二公皆訪僊歸

修竹封天翠澄江抱郭寒玄言浮齒頰仙氣在  
眉端訪嶽盟初定登朝興揔闡大丹如可就雞  
犬逐劉安

其二

任馬問劉營追隨弔古城霸圖雖已盡江怒幾  
曾平亂世孫曹事清時屈宋名新詩奇僻甚山  
水發才情

步長石過公安韻時將值生日

擅招雷電泛江湖謫作金門漢大夫尚有丹砂  
生唾霧總無白雪染頭顱登山且喜身常健出  
世還欣調不孤燒笋留君君竟去腐儒寧似郇  
公厨

又步長石舟中韻

劉郎浦口阮郎歸閨苑葵霞滿薜衣李泌身輕  
辭世染休文腰瘦懣前非人衝曉月聽潮去帆  
逐分風帶雪飛莫道長生學不得離家三月貌



能肥

得慎軒居士無病消息志喜

決定知無病西僧近面來乾坤留道眼河嶽護  
僊才好雨兼風至繁花間竹開懶殘無誑語計  
日聚焚臺

其二

西來傳好事起舞發狂顛白社何多幸蒼生定  
有緣維摩聊示疾弘景久成僊禽鳥知人意驪  
聲入管絃

簣簪谷暑中即事十絕

三杯薄醉拂桃笙一枕風牕夢也清  
天氣晚涼新浴後葛蕉紈扇竹中行

其二

新笋俄然過醉時長成拂雨帶雲枝  
更芟老竹千千個編作花蹊曲曲籬

其三

枇杷林裏問冬青池水正迎橘樂亭  
旋築小臺看乳月更將竹斷取浮萍

斷如蟬  
斷之斷

其四

姹草靈花到處叢  
堂前止剩一方空  
當門斫去芭蕉樹  
透過深林冷冷風

其五

翻江一夜雨滂沱  
門外油河長白波  
隔水酒人呼不得  
自傾家釀自狂歌

其六

只許山僧對此君  
柴門久已斷人羣  
梅花與裏孤筇至  
不是寒灰是冷雲

二俱高僧

其七

都無蚊蚋到禪房  
幃帳何曾掛竹床  
水冷石寒藏不住  
痴人錯料有仙方

其八

炎蒸日午氣如烹  
潛入深林自在行  
忽有濃雲西角起  
忙穿竹徑已飄傾

其九

擲江風散晚雲開  
沉水星河遶一臺  
半夜前林飛翮響  
郁浪湖上爆聲來

其十

朝烟暮月幾迴新  
世事何容到齒唇  
三伏不曾還內閣  
金鈴獨子吠來人

打桃有懷園主人王官谷

和枝帶葉不沾塵  
丹頰猶存一面春  
只道種桃容易等  
而今不見種桃人

其二

大兒撼樹小兒忙  
入草鳴階打石床  
拾取新桃三百顆  
清茶沉水薦王郎

送吳生東歸

一葉凌流去江聲伴寂寥酒澆盆浦月歌逆海  
門潮箋字文都滅刀環約已遙惟餘春雪在生  
計未蕭條

送彭長卿北遊

何處無游子君行太可憐老人年七十北地路  
三千夜雨投沙海西風立渭川餘生難自遣豈  
不愛高眠

賦得風林纖月落

宿鳥栖枝定淒清趁晚涼深林生衆響密葉釀  
微光竹露熒熒滴花渠澹澹香樓臺濃霧裡薄  
雪在西廊

其二

不辨烟林色惟餘灌木歌片時緘寶匣無計挽  
修娥樹影徐徐滅星文漸漸多溪楊歷亂處螢  
火欲燃波

其三

一縷穿阿閣盈盈傍露條似隨枝上下如與葉

飄搖入樹烟嵐重侵堦水氣銷何人閑伴我清  
坐轉無聊

其四

萬竅刀刁怒一鉤冷澹斜分妍與柳葉墮粉着  
梨花開士虛持貝仙源不認家靈妃歸路疾先  
爲掃塵沙

其五

搖竹難留照亭梧尚有光倚垣學顧盼隱葉效  
迷藏乍有芭蕉破如聞桂子香封姨休造次無



恐怕淒涼

無忌月中  
仙人

其六

澹澹荒荒夜蕭疎盡不成金箏千樹響銀甲一  
痕明紅葉將收淚白楊只戰聲何須重秉燭靜  
默坐西清

其七

緩去琉璃國端居人意孤林青山鬼笑露冷夜  
禽呼天地隨明滅松篁乍有無夜闌風更起滂  
湃湧江湖

七夕同彭長卿中郎

清譚閑送可憐宵竹戶斜通宛轉橋白水青林  
殊澹澹好風涼月夜蕭蕭貧來冶客傷時序老  
去詩人怨寂寥驚鳥不鳴更漏靜如聞銀浦弄  
輕潮

雨中夜酌彭生

我唱君須飲君歌送我觴蜀聲多俊快楚調也  
飛揚繞屋奔雷怒欺燈閃電光片時風雨寂明  
月在迴廊

月夜同中郎至柳浪

清極轉蕭條  
朱門傍曲橋  
月溪千畝淨  
風柳一湖搖  
鳥語歌中亂  
蓮香咲裏飄  
老僧眠復起  
披衲走茶寮

灌洋道中

野店午雞鳴  
編堤木槿榮  
帶牽長荇密  
梭擲小舟輕  
水落存洲背  
天空見樹城  
捍江無上策  
原隰少生成

江上聽董五歌

沙市女兒不解歌聽君一曲似韓娥黃雞唱罷  
人初醉江上東流柰樂何

曉坐

好風生樹露生臺獨看明河步幾回殘月朦朧  
穿殿角近鐘纔罷遠鐘來

沈生寘酒林伯雨園以病不至同吳未央  
徐楚楚賦得秋字

豈學元龍臥腰肢怯隱侯月來不待夜風至易  
成煠寫石花枝瘦窺池鶴韻幽良宵兼勝友無

主也堪留

早發公安有感書呈中郎

大旆清笳逆曉風  
青山新別住山翁  
難忘園竹千竿綠  
忍看湖楓十里紅  
喜懼關心倚雪裏  
悲歡滿目鴈行中  
也知悟得圓通法  
官署長林一樣同

荆門早發遊惠蒙泉

出城卽是水何不  
昨宵遊可惜好明  
月空然照碧流  
試茶分衆啜寫字  
被僧留若比康王  
谷峯

巒畧欠幽

泉上有黃山谷黃平倩大字偶題

凝珠噴雪沁心涼  
瞥見銀鈎掛石梁  
千古一雙黃太史  
不知誰解木樨香

麗陽驛

滿眼巉巖路稍平  
聚落依綠疇  
繞廬集赤地  
便鳥飛風急催霜至  
雲繁接日歸  
豈因愁朽蠹  
僑也損墻圍

宣城道中

幾日羊羹路能添髮上華南來愁怒嶺北去漲  
飛沙枳殼編籬密楓林繞屋遮久晴行役好只  
是困田家

道中聞柴車聲賦

肅肅百里見平疇風吹草根原野烁車聲軋軋  
不肯休欲出不出澁難抽利刀刺割銳且遁下  
灘之水咽不流吳中女兒好聲喉忽發清嗔襍  
歌謳莫是青腰彈箏篴中樹葉落鳴颼颼羈官  
遊子馬上愁酸風入眼淚雙流古道黃昏我心

憂白雪如山在前頭何不歸來走道周

襄陽道中

積雪在平沙澄潭宛宛斜剪齊十萬樹墨布雨  
三家金子明籬落樗蒲漾水涯楓林紅不盡散  
作一天霞

其二

風烟猶楚蜀音語帶周梁人學養魚法家傳種  
樹方雪黎作茗飲霜柿代餽糧滾滾蹄輪接玄  
宮與帝鄉



襄陽道中途龍君御時有出塞之行

已盡瀟湘路同班聲子荆漢臣重出塞才子更  
譚兵楯鼻書奇字饒歌有正聲偶然看舉止令  
我念亡兄

吾御與伯  
修甚肖

贈龍君御僉憲備兵甘肅

吾御前  
倅秦中

風流儒雅漢仙官笑靖胡沙學謝安十載旌旗  
重出塞早年詩賦已登壇別他漁浦花千樹度  
盡函關雪萬盤邐地近來痾瘵甚知君不用惠  
文冠

其二

大漠陰山朔路遙雪花亂點漢臣貂前茅虎旅  
傾秦甲後帳鶯雛盡楚腰香茗閣中書露布管  
絃聲裏破天驕邊人佇望從軍樂竹馬迎歌何  
暮謠

裕州道中

千古中原路蕭條似大荒朝廷急賦稅刺史歎  
流亡原兔藏烟突春禽乳盡梁從來嘯聚地招  
撫有遺崗

鄴城道中

天網羅奇士雲臺集勝遊才人千羽蓋鼓吏一  
岑牟水咽銅駝月風喧石馬爍南皮無俗韻漳  
浦有清流

其二

恠得如丸地能生許俊人駕鰲山有態照膽水  
無塵樂府挾詞麗漁阿唱梵新泥蛙非繡虎亦  
可作嘉賓

其三

只作詞場看何人不可傳霸圖無永歲文字有  
長年甄女蒲陳怨何郎粉唱玄至今臺上瓦和  
墨尚生妍

其四

看碣陸義和鳴鞭下峻坡人悲臺榭少狐喜墓  
田多山出濃鬢嶂溪流錦石波英雄無俗氣解  
道酒當歌

其五

司馬門前醉翻成泰伯賢文章勞反胃世路歎

磨錢五字銷奇氣千杯送壯年英雄韜不盡一  
箭兩禽連

其六

若話丹臺事乘除理亦然兩龍成霸業一虎作  
神仙天上無愁酒人間有限年阿甄雖婉麗不  
及玉妃妍

其七

驅馬莫匆匆慧人聚此中塵沙搏粉黛車斗筭  
英雄散火妖啼月旋空鬼戰風三臺猶可數何

處問離宮

其八

山是才人宅地爲霸王都  
流星傳璽綬飛電轉  
神州玉帳春鶯在金題  
海燕留青青陵上草天  
子永無憂

其九

白日不回照夜臺或有春  
交蘆學鳳嘯委木蛻  
龍鱗沙陣迷歸騎石  
皴嚙去輪冬衣猶未授何  
處問針神

其十

乍有雨聲至蕭蕭見白楊山川存舊韻草木嗅  
餘香野寺鐘聲月官橋石路霜重臺循可陟無  
奈遠遊忙

銅雀硯歌爲黃觀察賦

魏帝當年愁寂寞半謀征戰半行樂自言朝露  
去時多高築三臺結綺閣西園才子唱新詩南  
國佳人藏綉幙玉柱金題化爲烟至今碧瓦臺  
邊落當時英雄好文雅山川佳麗草木冶風流

詞藻氣薰蒸遺瓦猶堪供揮洒留與人間作結  
鄰鳳咮龍尾不如塵晉院唐宮收不盡猶餘一  
片在荆榛野人將來獻使君手自摩抄辨款文  
笑道古人作事異一瓦重來十八斤珍重付與  
老鈴下高坐盤礴任揮寫行草八分信手塗一  
泓春霧自傾瀉寫罷改衣發大叫雪花墨光相  
照耀午書歡喜廷珪嗔遠山袖手微微咲一朝  
醉我漳江畔尊疊中間誇古玩長髯堂吏雙手  
擎文綾未展先稱讚果然古物無如真潤澤光



王 卷之八  
瑩眼未見不用瑯琊自精堅先朝物力那能美  
咲謂使君英雄客四十方面門列戟肥腸巨嚙  
有用人大纛高牙勢赫奕只今邊徼要奇才走  
馬橫槊出疆場斗大鵠印肘後懸安得蕭閑伴  
冷石前年長安會大蘇蠶尾銀鈎世所無一從  
傳予運腕法自咲端不讓官奴行草翩翩入勝  
場只是濡筆少精良光滑由來不受墨骨粗又  
苦損毫芒使君劍戟尚駢馳獨我清閑好臨池  
慇懃擲與米顛去便是貧兒暴富時

中郎有鄭州憶伯修詩感賦呈中郎并示

方平

君在我未貴常念我貧賤我貴已有期君容不  
可見五十非上壽不能延漏箭道上白頭人滾  
滾如沙霰有鬢不待玄有顏不待變回思一生  
事急急如飛電昔時授餐館粉壁猶未換道旁  
嫩楊柳曾識舊顏面忍蘂以待蕨蕨尾終如幻  
同官三四人亞卿列朝殿天上好亨塗只是少  
壽筭貴賤不足論長年殊可羨百里千里程十

聲九聲歎生存好兄弟永作白頭伴形影相追  
隨莫效離羣鴈

涿州訪頓年丈園中

家世爲廉吏無多負郭田豈能凋素業只是守  
青編一水如凝雪千峯盡吐蓮入門莎不剪名  
士韻蕭然

送李酉卿叅知湖州

金節新頒出九天春明南去草芊芊鏡中鬢髮  
如螺黑腰下金章似火燃千里泛家臨水國萬

人遮馬看神仙建牙吹角渾閒事聞道而今是  
少年

其二

文人例合住湖州墨鈔飛英續勝遊紫橐仙曹  
辭盡省黑頭連帥領諸侯春山繞郭朝乘屐遠  
水浮空夜上樓才大官閒多韻事畫眉盤馬亦  
風流

密雲寄別四弟

錯料今生事蹉跎又一春夢腸才欲盡鍛羽淚

猶新老矣吾何許歸歟爾未貧故園風物好珍  
重待嚴親

其二

幕府方留客那能送汝行艱難別愛弟涕淚望  
都城野館濃花氣春塘沸水聲親朋如借問投  
筆欲從征

別陳孝廉

同是蕭條易水年兩人幕府共牀眠山游且學  
鄒從事米價難支白樂天杯裏楊花胡地雪夢

中芳草錦城煙陸郎已上班騅去帶草離離伴  
鄭玄

太保蹇令公一見辱以國士知率爾投贈  
共得七言律八首

三朝元老帝長城胸貯雄邊百萬兵太尉領軍  
陪漢相上公分陝護周京卿雲不散投戈色夜  
雨猶聞洗甲聲白紵青編無一事蕭然還是舊  
書生

其二

天家鎖鑰重漁陽親遣元臣鎮塞荒白羽扇中  
麾屬國青油幕底拜降王鶯花煖送千門雨介  
冑寒生六月霜身事累朝關社稷中宵私語跪  
焚香

其三

大旆春隨柳帶翻建牙吹角幾寒暄惟將安靜  
酬君父止以清廉畀子孫署裡葵蔬間視圃邊  
垣禾黍盡成村浣花溪上思垂釣師相那能避  
主恩

其四

塞北重欣借寇君琵琶曲裏說功勲  
校書百帙高連屋種柳千行翠入雲  
魯國到門諸弟子漁陽迴席舊將軍  
太平銷盡干戈氣閒却袁家倚

馬文

太保魯督學山東

其五

早年節鉞便登壇歷盡羊腸幾百盤  
怒擲千金酋長哭密誅三校悍兵安  
梧楸局外吹毛易劒戟林中任事難  
白髮老臣憂世道艱危未必是



呼韓

其六

戟枝入樹帶春鶯坐看邊峯雨後清萬卷每同  
袁伯榮千杯不讓鄭康成山程幸逐登臨屐月  
夜襲聞函道聲止恐三台虛上相尚書尺一要  
來迎

其七

屹然全似管靈光虎峙龍盤狐兔藏處世心同  
羊叔子立朝歲比郭汾陽止將文酒銷戎隙懶

把笙歌貯畫堂擬報國恩歸未得夢中常到午  
橋莊

其八

經營南北閱年華聞說活人事已奢榮戟門庭  
傳素業瑤環仙子吐奇葩千枚簡策同何氏七  
葉金貂事漢家尺宅寸田堪不朽何須粒棗大  
如瓜

密雲署中贈別周子還里

中人之仕少良謀輕將朝市換林丘下澤爲車

款段馬鄉里善人稱少游令公燾下士如雲掃  
門行炙上將軍驍騎材官可唾取君却掉頭如  
不聞自言身世無所羨離家既久思鄉縣有頭  
慵着進賢冠有手嬾控大羽箭夜踏月光聽水  
泉朝衝浩露看原田歸去閉門教兒子長養山  
中草木年

送人新授材官南歸

漁陽古署花不掃終日踏花聽新鳥覓得靈文  
苦伊吾拭眼明窓手自草古言直心是道場天

真不琢絕機巧紅塵赤日出燕關西川猶自在  
天杪告身一束也風流進賢輕不到人頭書生  
燈火幾年載猶帶儒冠着敝裘君不見袁小修  
署中聞蟬

乍聞聲切切便覺樹深深長日幽人意空山靜  
者音不妨禱盡角聊與伴瑤琴吸露絕塵滓吟  
成擲地金

其二

高柳孤鳴處千聲一息時風來傳靜院雨過沸

新枝此地聞孫嘯何人唱楚詞清秋猶自遠宋  
玉漫成悲

其三

話來清切處不必用宮商只益青山靜能添白  
日長翼隨雲氣薄聲帶露華香千古人習叨  
叨苦自忙

蔣子厚真長尚之看新月時子厚新自都  
中來此

月與人同瘦輕寒向晚生薄施風樹影澹咽水

泉聲盡祛周何累稍如維迪清嘿然亦自好時  
有暮禽驚

夜月

遲月月升林涼風細細發莫教塵想生點污松  
邊月

其二

明月在松枝光疑枝上露和光和露寒沁人心  
脾去

蔣子厚以詩投贈訊以詩旨予非其人也

書此志答

風雅久迷津文體歸酬應塵務一經心天分揔  
爲病俗腸非慧業媚世少高韻畫肉不畫骨筆  
底失神駿出水芙蓉鮮寧與雕搜並花月及江  
山千殊寫不盡愈出乃愈新發矍精光映道人  
無剩技所樂在閑靜不禱烟火塵泉石爲正令  
二何與弘景吐詞韶秀甚積迷忽以開此心如  
明鏡萬象絕搜求按指發海印公主擔夫爭大  
娘舞劒迅小技需神悟况與騷壇競努力窮其

源珠泉吐清詠聊作洗金鹽此道予不佞

夜

不復思文字披衣帶月行粉牆松樹影靜夜柳  
枝聲獨酌忽成醉無家也自清閉門孤寂處羸  
得會無生

卽事

五更車柱雨積水未全銷初日穿深樹曉風清  
石橋淺池窺獨鶴密葉沸叢鴝鷓金籠豈能  
無念碧霄



其一

巖岫知何意烟雲常自生靜餘苔少跡  
殊信樹多聲謝客山容健王微病骨清  
不知緣底事飄泊在檀城

曉

不識是何鳥天明話百般枕邊聞掃葉  
夢裏說游山除慾先除慧學禪且學閒  
覺來開眼處無事到心間

有懷

拭盞清光後陳琴沿露初竹棲常至鶴池養自  
來魚江氏十莖草班家萬卷書小園數畝地歸  
去理葵蔬

惠安伯張公園中芍藥盛開可十萬餘本  
同顧升伯李湘洲二太史中郎諸公往賞  
之有作

廿畝畦塍地栽蔬已是繁如何幽徑轉但見雪  
濤翻縵子難分色旋心不辨痕揚州花事減那  
得名園

珂

卷之四

目一

珂雪堂前集卷之四終

乾隆二年九月